



ILIDŽA

INFORMATIVNI BILTEN OPĆINE ILIDŽA
Ilidža • Juli-August 2015 • Broj 140





REDOVNA SJEDNICA OPĆINSKOG VIJEĆA

30. redovna sjednica Općinskog vijeća Ilidža



Općinsko vijeće Ilidža na 30. redovnoj sjednici koja je održana 27. avgusta 2015. godine usvojilo je Izvještaj o izvršenju budžeta općine Ilidža za period 1. 6. – 30. 6. 2015. godine. U ovom periodu ostvaren je prihod od 18.940.715 KM što iznosi 61 posto izvršenja budžeta, a u istom periodu ostvareni su rashodi od 9.893.203 KM ili 31,9 posto. Vijeće je donijelo odluku o osnivanju Jedinственог općinskog organa uprave, stručnih i posebnih službi Općine Ilidža kojom se utvrđuje broj i naziv općinskih službi za upravu, stručnih i posebnih službi, organizacija, djelokrug i način rukovođenja.

Vijeće je donijelo odluke o usvajanju i provođenju regulacionih planova „Nova Ilidža 2“ i „Nova Ilidža 3“ kojima se utvrđuju granice prostorne cjeline, namjena površina, urbanističko-tehnički uslovi za izgradnju građevina, uređenje zelenih i slobodnih površina, uređenje vodotoka rijeke Željeznice te odnos prema postojećim građevinama. Time su stvoreni svi zakonski uslovi za realizaciju jednog od najvećih i najznačajnijih projekata za općinu Ilidža. Općinsko vijeće je na sjednici imenovalo vršioce dužnosti predsjednika i članova skupštine Javnog preduzeća za obavljanje komunalnih i drugih djelatnosti od javnog interesa općine Ilidža „Ilidža“ d.o.o. Za predsjednika je imenovan Hubijar Alvid, a za članove skupštine Žujo Mirsad i Bešić Hidajet, te utvrđeni posebni uslovi za imenovanje predsjednika i dva člana skupštine preduzeća.

Općinsko vijeće je jednoglasno donijelo odluku o davanju saglasnosti „Mujanić“ d.o.o.

Ilidža za postupak dodjele koncesije za eksploataciju tehničke vode na lokalitetu Blažuj.

Donesen je i zaključak o usvajanju Elaborata o privremenom korištenju javnih površina za potrebe postavljanja slobodnostojećih reklamnih panoa na području općine Ilidža.

Prilikom razmatranja Informacije o stanju komunalne higijene na javnim površinama i koritima rijeka na području općine Ilidža Vijeće je konstatovalo da nije na zadovoljavajućem nivou, te predlaže da se poveća broj lokacija i posuda za odlaganje kućnog otpada, poveća učestalost odvoza na najkritičnijim lokacijama, da se uvede u većem broju ulica ručno prikupljanje kućnog otpada, poveća učestalost pranja prometnih površina, te da se pokrenu aktivnosti na izmjeni važećih zakona u ovoj oblasti i da Kanton Sarajevo obezbijedi veća finansijska sredstva za unapređenje pružanja komunalnih usluga.





Primarni zadatak očuvanje opstojnosti i cjelovitosti Bosne i Hercegovine



Svečana sjednica Općinskog vijeća Ilidža održana je 27. jula 2015. godine u Multifunkcionalnoj sali i posvećena je 23. godišnjici formiranja Četvrtе viteške motorizovane brigade, čiji su borci dali ogroman doprinos u odbrani slobodnih ilidžanskih teritorija. Sjednici su, pored vijećnika i pripadnika ove brigade, prisustvovali predstavnici kantonalne i općinske vlasti, boračkih udruženja i šehidskih porodica. Evocirane su uspomene na ratni put ove važne brigade, a učenjem Fatihe i minutom šutnje odata je dužna počast njenim palim herojima. Prije svečane sjednice brojne delegacije položile su cvijeće ispred centralnog spomen-obilježja ispred zgrade općine.

Predsjedavajući Općinskog vijeća Ilidža Muhamed Omerović smatra da se s ponosom treba čuvati sjećanja na ovu brigadu i da nikad ne smiju biti zaboravljene zasluge ljudi iz ove brigade.

Načelnik Općine Ilidža prof. dr. Senaid Memić rekao je da BiH i danas prijetе, a jedini način da zaštitimo je, da jedni drugima vjerujemo i poštujemo se i radimo vrijedno kako bi ušli u EU. „Nećemo sumnjati u našu budućnost. Čestitam prisutnima na osjećajima patriotizma i čini mi čast što sam danas s vama. Obilježavanjem godišnjice formiranja brigade uvijek ćemo čuvati uspomenu na naše šehide, poginule i umrle borce i prenositi priču na buduće naraštaje“ izjavio je načelnik Memić. U svom govoru predsjednik Udruženja Četvrtе viteške brigade Emir Redžović istakao je da se okupljanjem za godišnjice produžava tradicija, i ne zaboravlja požrtvovanost i herojstvo brigade.

„Naša djeca, porodice, rodbina i prijatelji su čuvari slave, viteštva i ljubavi koju je narod slobodnih ilidžanskih prostora gajio prema našoj brigadi. Branеći ilidžanske prostore, pripadnici Četvrtе viteške motorizovane brigade odbranili su ideju tolerancije i suživota među ljudima različitih vjera i nacija. U ovom svečanom trenutku sa dužnom zahvalnošću sjetimo se naših šehida i poginulih boraca i upitajmo se šta smo učinili za njih, njihove porodice i njihove saborce koji

su ostali invalidi. Ovo pitanje treba svakodnevno postavljati i pošteno odgovarati na njega. Borcima i njihovim porodicama treba vratiti ljudsko dostojanstvo. Mi smo jedna porodica, pomozimo jedni drugima i siguran sam da ćemo tako lakše naći izlaz iz svih problema“ rekao je u svom govoru Emir Redžović, dodajući da ovi ljudi jesu i trebaju biti pokretačka snaga Ilidže, Kantona i države.

„U ovim modernim vremenima 23 godine od formiranja brigade borimo se na potpuno novim ratištima, sa novim i drugačijim izazovima i prijetnjama. U ovom historijski bitnom trenutku za Bosnu i Hercegovinu kada se isti oni koji su 1992. godine željeli da je nestane ponovo mobilišu, moramo poraditi na jačanju i uvezivanju naših redova. Danas moramo biti spremniji nego ikada do sada. Naš primarni zadatak bio je i uvijek će biti očuvanje opstojnosti i cjelovitosti Bosne i Hercegovine“ rekao je Redžović, istakavši da starije naraštaje treba podsjećati, a mlade upoznavati s djelima i osobama iz ratne historije i čuvati uspomenu na njih kroz podučavanje djece, učenika i studenata.

Na sjednici su uručene i zlatne plakete zaslužnim članovima ove brigade. Pored svečane sjednice OV-a Ilidža, godišnjicu ove brigade pratilo je niz aktivnosti. Položeno je cvijeće na šehidska mezarja, proučena hatma-dova u džami-jama, a, 28. jula, u večernjim satima organizovana je centralna manifestacija ispred Doma kulture u Hrasnici.

Četvrtа viteška je predstavljala jedan od temelja Armije BiH, i okosnicu udarne moći vojske u odbrambeno-oslobodilačkom ratu. Tokom čitavog rata brigada je bila konstatno u prvim redovima odbrane, branеći kapiju grada Sarajeva i vrata Bosne i Hercegovine. Zona njihove odgovornosti predstavljala je glavnu arteriju za funkcionisanje države. Visokim stepenom vojne ustrojenosti, obučenosti, požrtvovanosti i odanosti državi, političkom i vojnom rukovodstvu uspjeli su u potpunosti izvršiti povjereni zadatak i sačuvati slobodne teritorije općine Ilidža.



Ilidžancima novih 250 klupa za odmor

Ugovor o sufinansiranju proizvodnje, nabavke i montaže 250 gradskih klupa na području općine Ilidža potpisan je 10. augusta u Općini Ilidža. Ugovor su potpisali načelnik Općine Ilidža prof. dr. Senaid Memić i direktor firme „Ben“ d. o. o Yilmaz Ziya Burak.

Klupe su modernog dizajna i bit će postavljene na svim frekventnim lokacijama i to oko prostorija MZ, Domaova ambulanti porodične medicine, šetališta, oko hotela i u Velikom parku.

Općina Ilidža je bez ikakvih troškova u ovom projektu, zauzvrat finansiranja proizvodnje i ugradnje klupa odobrila firmi „Ben“ d.o.o pravo na iskorištavanje prostora za oglašavanje na predviđenim mjestima na klupi u trajanju najmanje pet godina. Firma „Ben“ d.o.o. osim što će finansirati nabavku i proizvodnju najmanje 250 gradskih klupa, preuzela je obavezu finansiranja redovnog godišnjeg održavanje klupa što podrazumijeva otklanjanja svih nedostataka koji su nastali redovnom upotrebom klupa i uplaćivati iznos predviđen zakonom na račun Općine Ilidža do 15. januara tekuće godine za predhodnu godinu.

„Ovo su moderne klupe, estetski lijepe koje će služiti stanovništvu za odmor. Apelujem na građane da ovo čuvamo kao zajedničku imovinu i da se prema njoj odnosimo domaćinski“ izjavio je načelnik Memić.

Direktor firme „Ben“ d. o. o Yilmaz Ziya Burak kazao je da ovim poslom u kojem će oni reklamirati druge, rasterećuju općinu troškova, a korisnicima daju moderno mjesto za odmor.

Potpisan Sporazum o izgradnji kanalizacione mreže na području općine Ilidže

Načelnik Općine Ilidža prof.dr. Senaid Memić i ministar Komunalne privrede i infrastrukture Kantona Sarajevo Senad Hasanspahić potpisali su 31. jula 2015. godine u zgradi Kantona Sarajevo Sporazum o finansiranju/sufinansiranju projekata izgradnje i sanacije kanalizacione mreže na području općine Ilidža, te izgradnje priključaka na novoizgrađenu vodovodnu mrežu u naselju Rakovica. Kanton Sarajevo je za ove projekte izdvojio 210.000,00 KM.

Kako je rekao ministar Hasanspahića, u pitanju su namjenska sredstava prikupljena kroz plaćanje vodne naknade.

„Ovo je četvrta po redu lokalna zajednica kojoj su iz Budžeta KS za 2015. godinu doznačena sredstva a koja će biti utošena za rekonstrukciju vodovodne i kanalizacione mreže. Za te je svrhe u svih devet općina planirao ukupno šest miliona KM“, rekao je ministar Hasanspahić.

Prema ovom sporazumu, 110.000,00 KM bit će utrošeno za realizaciju prve faze izgradnje fekalnog kanalizacionog kolektora za rješavanje odvodnje otpadnih voda dijela naselja Ilidža, Blažuj i Rakovica.

„Našoj općini je prioritetna izgradnja nedostajuće kanalizacione mreže, ali i dalje imamo problema sa neadekvatnom postojećom mrežom. Izgradnjom kućnih priključaka na novoizgrađenu vodovodnu mrežu u naselju Rakovica okončao bi se postupak obezbijedenja pitke vode sa gradskog vodosnabdjevanja“ izjavio je načelnik Memić.



Udruženje poljoprivrednika Turske posjetilo Općinu Ilidža

Delegacija Udruženja poljoprivrednika uzgajivača sitne stoke Turske, koja se nalazi u posjeti Bosni i Hercegovini, 31. avgusta posjetila je Općinu Ilidža. Poljoprivrednike iz Republike Turske primio je načelnik prof. dr. Senaid Memić sa saradnicima. Na sastanku su razmijenjena mišljenja i iskustva iz ove oblasti i razmotreni mogući oblici saradnje sa našom općinom. Gosti iz Turske su prilikom posjete domaćinima prezentovali svoj dosadašnji rad i postignute rezultate u uzgoju stoke. Tom prilikom su iskazali želju za saradnjom sa poljoprivrednicima iz BiH, a i općine Ilidža. Posebno su naglasili značaj i uspostavljanje saradnje univerziteta Turske i BiH iz ove oblasti. Načelnik Memić je tursku delegaciju upoznao i sa ekonomskim, privrednim i turističkim potencijalima i razvojnim projektima općine. Načelnik je pokrenuo inicijativu za formiranje udruženja poljoprivrednika Ilidže koje bi usko sarađivalo sa poljoprivrednicima Turske.

Zakonske procedure neophodne za realizaciju ovih projekata provest će Općina Ilidža, a nadzor nad izvođenjem radova vršit će Zavod za izgradnju KS. Općina Ilidža se obavezala da će po okončanju projekta Ministarstvu dostaviti cjelokupnu dokumentaciju i izvještaj o izvršenim poslovima.





Tradicionalni prijem za šehidske porodice

U povodu Ramazanskog bajrama i Dana šehida u Općini Ilidža 18. jula 2015. je upriličen tradicionalni prijem za 25 šehidskih porodica čiji su članovi poginuli kao pripadnici Armije RBiH, odnosno roditelje koji su izgubili svoju djecu. Porodicama je uručeno po 100 KM.

Načelnik Memić je rekao kako šehidske porodice zaslužuju duboko poštovanje i da je veoma bitno da se Dan šehida obilježi na dostojanstven način.

„Znam da je danas veoma težak dan jer odajemo poštovanje našim najmilijim koji su dali svoj život braneci državu Bosnu i Hercegovinu. Naša je obaveza da svakodnevno mislimo na njih, a i na njihove porodice. Moja vrata za vas su uvijek otvorena i moje je mišljenje da ispred vas u ovoj državi ne smije stajati niko jer niko nije dao kao vi za nju. Čast mi je da mogu biti vama uvijek dostupan i pomoći vam uvijek koliko mogu, jer vaša patnja je nenadoknadiva. Sloga i povjerenje je ono što moramo njegovati i graditi državu kakvu su oni željeli i za kakvu su dali živote” izjavio je načelnik Memić, dodajući da ove porodice imaju potpuno pravo da budu nezadovoljne prioritetima u državi.

„Raduje me činjenica da se neko sjetio kako šehida, tako i članova njihovih porodica. Novčana pomoć nije toliko bitna, koliko je važno sjećanje na naše poginule. Moj sin Haris koji bi danas proslavio rođendan imao je kartu za avionski let na početku rata. Nije htio da ode, htio je da ostane uz svoj narod i pomaže mu. On je bio doktor. Zarobili su ih četnici, njih šest i njega su ubili. Pretužni smo danas, mi znamo kako patimo, ali smo ponosni i ne predajemo se jer tako ne bi željela naša djeca. Hvala Općini koja mnogo pomaže našoj populaciji i to ne samo na ovaj način na mnoge druge načine nismo zaboravljeni“ kazao je Mustafa Merzić, otac šehida. Prijemu su prisustvovali i predstavnici Organizacije porodica šehida i poginulih boraca Općine Ilidža, na čelu s predsjednikom Alminom Škrijeljkom.

Načelnik je obećao finansiranje izleta na Igman u augustu za šehidske porodice, kako bi se ove porodice družile i bar malo olakšale svoju bol.



Uručeni ugovori za (su)finansiranje 14 projekata za mlade

Načelnik Općine Ilidža prof. dr. Senaid Memić 30. juna 2015. godine uručio je ugovore za (su)finansiranje projekata za mlade iz budžeta Općine za 2015. godinu. Na osnovu definisanih kriterija za dodjelu sredstava iz budžeta za mlade na javni poziv mogla su aplicirati omladinska udruženja, registrovana udruženja i fondacije koji rade za mlade, te neformalne grupe mladih uključujući i vijeća učenika srednjih škola. Projekti moraju biti namijenjeni mladima sa područja općine Ilidža, da aplikanti nisu ogranak bilo koje političke partije, da se realizuju do kraja tekuće godine, da se projekti odnose na kreativno izražavanje, neformalnu edukaciju, ekologiju, promoviranje volonterizma i timskog rada, podršku mladim sa posebnim potrebama i izgradnju i razvoj lokalne zajednice. Na prijedlog Komisije za odabir projekata za mlade općinski načelnik je donio odluku o finansiranju 14 projekata za čiju realizaciju je izdvojeno 13.710 KM.

„Ovo je samo jedan dio ideje o aktivnostima sa mladim kako bi dali makar mali doprinos u poboljšanju odnosa u društvu. Vi treba da ste najnapredniji dio naše zajednice i jedan od faktora koji će doprinijeti razvoju i stabilizaciji društva“, kazao je u svom obraćanju mladim načelnik Memić.



Adaptacija u Četvrtoj osnovnoj školi

Ugovor o adaptaciji sanitarnih čvorova u Četvrtoj osnovnoj školi potpisan je 14. augusta.

Ugovor su potpisali direktor Četvte osnovne škole Hamid Guska i direktorica Famos Gradnje d.d. Sarajevo Arijana Zorlak. Radovi su započeti odmah kako bi većim dijelom bili završeni do početka školske godine.

Općina Ilidža je obezbijedila sredstva za realizaciju ovog značajnog ugovora.



Obilježena godišnjica pogibije četiri heroja

U sklopu obilježavanja 23 godišnjice formiranja Četvrte viteške motorizovane brigade 28. jula 2015. godine, zvaničnici, preživjeli saborci, porodice šehida, na čelu sa komandantom Četvrte viteške brigade generalom Fikretom Prevljakom obišli su i položili cvijeće na mjesto stradanja Emira Bogunića - Čarlija, sestara Samire i Mevlide Elčić i Džemaila Bulbula na Golom Brdu.

„Mi iz godine u godinu se okupljamo i svake godine dođe puno saboraca, na što sam ponosan. Prije 22 godine naši pripadnici Četvrte viteške brigade krenuli su na Golo brdo, koje su držali četnici, jer je bio odsječen put prema Hrasnici. Tada su poginuli Emir Bogunić Čarli, koji je bio i komandant ovog pravca, komandant diverzantata, Džemo Bulbul i naše heroine sestre Elčić. Njih četvero imaju ogromne zasluge koje ne smiju nikad biti zaboravljene. U sklopu godišnjice brigade 430 porodica je posjećeno, uručeni su im paketi, ali najvažnije da su im se otvorila vrata i da nisu zaboravljeni „izjavio je general Fikret Prevljak.

Kćerka Emira Bogunića Čarlija, Adisa na ovaj dan je najtužnija, ali kako reče, njen otac joj je ostavio u amanet da hoda gorde glave i da bude borac.

„Zadnji put kad je otišao na Golo brdo, imala sam četiri godine i sjećam se kao sad, da sam ga zagrlila i rukom prošla kroz njegovu kosu i i tačno sam znala da ga nikad više neću vidjeti“ rekla je Adisa.

„Želim da napišem knjigu o svom ocu i diverzantskom odredu, želim da se zna istina i da se nikad ne zaboravi junaštvo ovih ljudi“, kaže Adisa, danas prelijepa djevojka, kćerka legendarnog Čarlija, ističući da njegovi suborci je i danas čuvaju kao svoje djete, ali da joj je otac uvijek nedostajao u svakom trenutku života.

„Kao da sam ostala bez kičme, jer teško je koračati kroz život bez muške ruke. Mama i ja smo ostale same, oslonjene jedna na drugu, danas smo najbolje prijateljice i ne želim da hodam pognute glave jer moj otac bi želio da ja budem borac i snažna osoba što sam i postala“ sa suzama u očima završava Adisa.

Potom su delegacije položile cvijeće na mezarje Emira Bogunića Čarlija i Ejuba Sarajkića Eke, ispred Doma kulture u Hrasnici.



Obilježene 23 godine „Bitke za Famos“

U naselju Lasica u Hrasnici 4. augusta 2015. godine obilježena je 23. godišnjica „Bitke za Famos“ u kojoj je poginulo 27 pripadnika 104. motorizovane brigade Armije RBiH. Delegacije Općine Ilidža, Udruženja 104. Viteške brigade, članovi porodica šehida i poginulih boraca položile su cvijeće kod spomen-ploče u Lasnici i ispred spomen-obilježja u Hrasnici.

„Naše oružje treba biti znanje, naši borci trebaju biti mladi inženjeri, doktori i naučnici. Samo tako ćemo bar donekle moći otplatiti dug našim šehidima. Žrtve naših šehida nikad neće biti zaboravljene, a mi ćemo nastaviti borbu za očuvanje jedine naše domovine“ poruka je sa ovog skupa. Jedan od učesnika „Bitke za Famos“ Amir Džafo prisjetio se bitke 1992. godine.

„Današnji datum je prije svega tužan, bolan i težak. Amanet svih nas treba biti sjećanje na one koji nisu štedili sebe. Iako smo slabije naoružani bili tog 4. augusta 1992. nismo dozvolili četnicima da prođu i popale naša ognjišta. Praznina je tu uvijek sa nama, na površini je uvijek bol i sjećanje ali nastavljamo živjeti. U ovom vremenu u kojem smo danas, svjedočimo o onome što smo preživjeli, imamo obavezu da govorimo o agresiji i ponosno kažemo da smo odbranili svoje domove.“ rekao nam je jedan od učesnika bitke Amir Džafo.

Načelnik Općine Ilidža prof. dr. Senaid Memić kazao je da sjećanja na šehide i poginule borce uvijek trebaju da žive, da se iz njih treba izvući snaga i pouka, te postati borac za pravdu i dobro među ljudima.

„Bitka za Famos je jedna od najvažnijih bitaka koje su se desile 1992. godine. Svojim prisustvom moramo pokazati da ih nećemo zaboraviti, jer zaborav je posljednja etapa zločina. Onih, čija su imena uklesana na ovaj kamen, nije bilo strah da se suprotstave pa zato i nas ne treba biti strah da negujemo uspomene u miru, kojeg su nam oni obezbijedili“ izjavio je načelnik Općine Ilidža prof. dr. Senaid Memić.

Nakon polaganja cvijeća, položeno je cvijeće i proučen jasin na mezarju Kovači-Hrasnica.



Počela regulacija korita Bosne

Na području općine Ilidža, tačnije u MZ Osjek 21.jula 2015. godine započeli su radovi regulacije korita Bosne. Vrijednost investicije je 2.680.000 eura. Rok za završetak radova je 365 dana. Nadzor nad radovima vrši IPSA Institut Sarajevo, a izvođač je HP Investing Mostar. Sredstva su obezbijedena putem IPA fondova.

“Prve kiše ovdje uvijek donose probleme stanovnicima koji imaju kuće u blizini Bosne. Pitanje regulacije, odnosno rješavanje je najznačajnije pitanje za stanovnike Osjeka i stanovnici željno su iščekivali početak radova. Na ovaj način će se pokušati riješiti problem plavljenja. Općina Ilidža je izdala četiri građevinske dozvole i ostao je još jedan dio gdje su neriješeni imovinsko-pravni odnosi, što će i u narednom periodu biti prioritet. Općina Ilidža je do sad izdvojila 1.200.000 KM za rješavanje imovinsko-pravnih odnosa za stvaranje uvjeta za regulacije. Dužina regulacije koja će se raditi je 3.600 metara” izjavio je predsjedavajući Općinskog vijeća Ilidža Muhamed Omerović.

Završeni radovi regulacije vodotoka Tilave i Zujevine

Na području općine Ilidža okončani su radovi regulacije vodotoka Tilave i Zujevine. Peta faza regulacije korita vodotoka Zujevine na lokalitetu Blažuj je završena. Posao je Općina Ilidža povjerila firmi „Mevludin commerc“, d.o.o Ilidža, a za te svrhe iz budžeta je izdvojeno 300.001,44 KM. Uradio se obostrani betonski zid visine tri metra i dužine 140 metara. U MZ Butmir završeni su i radovi regulacije korita Tilave. Izvođač radova je firma MGBH d.o.o, a vrijednost 75.800 KM. Radila se se regulacija širine šest, a dužine 60 metara. Finansijer je Općina Ilidža.



Asfaltirano 12 ulica, Općina uložila 431.000 KM

Na području općine Ilidža završeno je asfaltiranje 12 ulica, a Općina je za ove radove izdvojila oko 431.000 KM. U MZ Blažuj završena je rekonstrukcija platoa ispred pošte. Urađeno je u dužini od 92 i širini osam metara. Investitor je Općina Ilidža, a izvođač firma Mevludin Commerce d.o.o. Sarajevo. Vrijednost radova je bila oko 33.000 KM. U ovoj mjesnoj zajednici u toku je i rekonstrukcija kraka u ulici Vlakovo u dužini 180 metara i širini 3,5 metara. Općina Ilidža je povjerila posao Mevludin Commerce d.o.o. Sarajevo u vrijednosti 26.000 KM.

U MZ Donji Kotorac završeno je asfaltiranje ulice Vasilija Grdžića u dužini 390 i širini četiri metra. Finansijer je Općina Ilidža u vrijednosti 65.000 KM, a Mevludin Commerce d.o.o. Sarajevo je bio izvođač. Stanovnici ulice Braće Toković u MZ Hrasnica II dobili su novi asfalt u dužini 350 metara. Investitor je Općina Ilidža, izvođač radova bila je firma Sarajevoputevi d.d. Sarajevo, a vrijednost oko 45.000 KM. Okončani su i radovi rekonstrukcije ulice Gorana Čišića u MZ Stup. Dužina koja je urađena je 379, a širina tri metra. Ovo je zajednička investicija Općine Ilidža i građana. Izvođač radova bila je firma KJKP “Rad” d.o.o. Sarajevo, a iz svog budžeta Općina je izdvojila 25.000 KM. Rekonstruisano je i 35 metara ulice Gaj u MZ Hrasnici I. Izvođač radova bila je firma KJKP “Rad” d.o.o. Sarajevo. Investitori su Općina Ilidža i građani, a Općina je finansirala sa 2.000 KM. U MZ Blažuj završeni su i radovi asfaltiranja ulice Grabovine u dužini 1000 i širini tri metra. Investitori su Općina Ilidža i građani. Izvođač radova KJKP “Rad” d.o.o. Sarajevo. Iz Budžeta je za ovaj projekat izdvojeno 90.000 KM. U ovoj MZ okončani su i radovi asfaltiranja ulice Vidovci u dužini 250 i širini tri metra. Radove su finansirali Općina Ilidža i građani. Izvođač radova bila je firma KJKP “Rad” d.o.o. Sarajevo. Općina je učestvovala sa 21.000 KM. Okončani su i radovi rekonstrukcije ulice Rogaćići. Urađena je dužina 145 metara i širina 3,5 metara. Poslovi su finansirani zajedničkim sredstvima Općine Ilidža i građana. Izvođač je bila firma KJKP “Rad” d.o.o. Sarajevo, a Općina je izdvojila 17.000 KM. Završena je rekonstrukcija ulice Gaj od broja 20 u MZ Hrasnica I. Dužina je 95 metara, širina tri metra. Investitor Općina Ilidža i građani. Izvođač radova KJKP “Rad” d.o.o. Sarajevo. Iz Budžeta izdvojeno 8.000 KM. Završeno je asfaltiranje ulice Kamenolom u MZ Blažuj u dužini 500 metara i širini tri metra. Investitori su Općina Ilidža i građani. Izvođač radova je KJKP “Rad” d.o.o. Sarajevo. Općina je učestvovala sa 40.000,00 KM

U MZ Vreoca okončani su radovi rekonstrukcije ulice Vreoca u dužini 350 i širini tri metra. Općina Ilidža je za ove radove izdvojila 23.0000 KM, a posao je bio povjeren firmi KJKP “Rad” d.o.o. Sarajevo. Općina Ilidža u iznosu 36.000 KM je finansirala radove rekonstrukcije ulice Ilidžanska -povratničko naselje u Gornjem Kotorcu. Urađen je asfalt u dužini 365 i širini tri metra, a radila je firma Sarajevoputevi d.d. Sarajevo.



Slada Hodžić pobjednica festivala narodne muzike „Ilidža 2015“



Ovogodišnji festival narodne muzike „Ilidža 2015“ održan je 21. i 22. avgusta na ljetnoj pozornici na Ilidži, a Općina Ilidža kao tradicionalni organizator dosadašnjih festivala organizaciju i realizaciju festivala povjerila je Hayat TV-u. Festival je trajao dvije večeri. Na prvoj takmičarskoj večeri nastupile su nade bosansko-hercegovačke muzičke scene i drugoj revijalnoj na kojoj su pjevali doajeni sevdaha. Petnaest kompozicija i izvođača takmičilo se za festivalske nagrade koje ni kiša nije spriječila, a posjetioci i gledaoci pored malih ekrana uživali su u lijepoj pjesmi. U potrazi za svojim mjestom pod estradnim nebom svoju sreću okušali su Semir Hasić, Adnan Nezirov, Džana Ljuca, Ifeta Behmen, Šaćir Ameti, Šerif Ćosić, Adan Mulahasanović, Slada Hodžić, Nesib Delibegović, Afan Smajlović, Abid Sakalaš i Ivan Grubišić, Zijad Klopić, Asim Brkan, Nihada Kapetanović i Anel Ćorda.

Kao specijalni gosti takmičarske večeri nastupili su Hari Varešanović, Denijal Ahmetović i Ljubica Berak.

Stručni žiri u čijem sastavu su bili Vehid Gunić, Nedžad Salković, Benjamin Isović, Hanka Paldum i Lana Pačuka za pobjednika festivala narodne muzike „Ilidža 2015“ proglasili su pjesmu „Ni zore, ni dana“ u izvođenju Slade Hodžić. Autor muzike pobjedničke pjesme je Mensura Bajraktarević, teksta Lejla Adilović Tahirović i aranžmana Almir Buza koji je dobio nagradu za najbolji aranžman. Slada Hodžić je nagrađena i kao najuspješnija interpreta-



torka. Nagradu za najbolji tekst dobio je Ismet Horo za pjesmu „Sarajevo“, a za muziku iste pjesme Samir Zavlan.

Festival je završen koncertom sjećanja na uspješne pjesme i izvođače ranijih ilidžanskih festivala pod nazivom „Čuvari tradicije“. Publika je uživala u pjesmama koje su izvodili Mirza Šoljanin, Sejo Pitić, Merima Njegomir, Muharem Serbezovski, Anida Idrizović, Nedžad Salković, Hanka Paldum, Zora Dubljević, Elvira Rahić, Orhan Čakmak, Bahrija Hadžialić, Arif Alajbegović, Armin Muzaferija, Kemal Hasić i Ljubica Berak. Ilidžanske pjesme se pjevaju i danas, a stižu i nove nade i nove pjesme.



Potpisan Sporazum za sanaciju podova i sanitarnih čvorova u Četvrtoj osnovnoj školi

Sporazum o obezbjeđenju sredstava za adaptaciju sanitarnih čvorova i sanaciju podova u Četvrtoj osnovnoj školi Ilidža potpisan je 14. jula 2015. godine u Općini Ilidža. Sporazum su potpisali prvi čovjek Općine, načelnik prof. dr. Senaid Memić, ministar za obrazovanje, nauku i mlade Kantona Sarajevo Elvir Kazazović i direktor Četvrtne osnovne škole Hamid Guska. Općina Ilidža je za ovaj projekat sanacije obezbijedila 50.000 KM.

„Hvala Općini Ilidža, odnosno načelniku i Općinskom vijeću na razumjevanju. S obzirom da je tri četvrtine podova oštećeno i već smeta djeci kada hodaju, o toaletu da i ne govorim, ovom sanacijom djeci će se stvoriti bolji uslovi za rad i boravak. Donacija je došla u pravo vrijeme i nadamo se da će do početka školske godine radovi biti okončani“ rekao je Hamid Guska, direktor Četvrtne osnovne škole.

Ministar Elvir Kazazović je izrazio zahvalnost Općini Ilidža koja već dugi niz godina pomaže škole na svom području.

„Ministarstvo obrazovanja, nauke i mladih Kantona Sarajevo je u teškom stanju trenutno i oslanjamo se na saradnju sa lokalnim zajednicama koje izdvajaju iz svojih budžeta sredstva za adaptaciju škola. Općina Ilidža je svjetli primjer. Kroz racionalizaciju koju provodimo u Ministarstvu, iskreno se nadamo da ćemo obezbijediti sredstva i da ćemo pomagati renoviranje mnogih škola“



kazao je Elvir Kazazović, ministar obrazovanja, nauke i mladih KS.

„Djeca će biti u opremljenijim, boljim objektima nego su bila prije. I ove budžetske godine izdvojili smo značajna sredstva za sanaciju škola i ja bih rekao da su ova sredstva u iznosu od 50.000 KM značajna investicija, ali ne i jedina kad je u pitanju obrazovanje. Iako nije naša nadležnost mi se trudimo da našim školama pomazemo i uvijek ćemo to činiti“ kazao je načelnik Općine Ilidža prof. dr. Senaid Memić, dodajući da Ilidža cijeni znanje, kvalitet i sposobnost i time se ponosi.

Izabrana najljepša dvorišta i balkoni Ilidže

Općina Ilidža je i ove, kao i prethodnih godina, organizovala izbor najljepšeg dvorišta i balkona sa cvjetnim aranžmanom, a s ciljem očuvanja tradicije ilidžanskih bašti, ali i podizanja svijesti građana o značaju očuvanja životne sredine i poboljšanja turističke ponude. Na raspisani javni poziv prijavilo se 30 aplikacija koje je komisija za izbor obišla i odabrala najbolje, kojima je načelnik Općine Prof. dr. Senaid Memić uručio nagrade.

„Nismo mi vas nagradili, vi ste nas nagradili ovom ljepotom, koja oplemenjuje i stvara ugođaj za oči i dušu. Nastavite da uređujete i njegujete vaša dvorišta i balkone“, kazao je načelnik Memić.



Za najljepše dvorište prva nagrada pripala je Amiru Čauševiću iz Sokolović-Kolonije, drugo mjesto osvojila je Enisa Kečo iz Hrasnice, a treće Rahima Glođo iz Ilidže. Najljepši balkon sa cvjetnim aranžmanom je Slavice Zilić iz Otesa, dok je drugo mjesto pripalo Hadiji Skalonjić iz Hrasnice, a treće Mehudini Glođo takođe iz Hrasnice. Za sve njih Općina Ilidža obezbjedila je novčane nagrade, i to u kategoriji najljepšeg dvorišta za prvo mjesto 500, drugo 400 i treće 300 KM. Za najljepši balkon prva nagrada iznosi 300, druga 200 i treća 100 KM. Enisa Kečo čije dvorište je osvojilo drugo mjesto, novčani dio nagrade u iznosu od 400 KM poklonit će nekoj od porodica sa Ilidže koja je u stanju socijalne potrebe.



Završena izgradnja biciklističke staze

Završena je izgradnja biciklističke staze na Ilidži. Položena je horizontalna i vertikalna signalizacija.

Izvođač radova je firma Grakop d.o.o. Kiseljak, a finansijeri su bili Općina Ilidža i Direkcija za ceste KS. Izgradila se biciklistička staza u dužini 3. 410 metara.

Biciklistička staza će biti dvosmjerna, a uz nju će ići pješačka staza što će upotpuniti izgled ovog dijela općine, te će promovisati biciklizam kao ekološko prevozno sredstvo.



Gradi se novi objekat MZ Vreoca i Vrelo Bosne

Započeli su radovi izgradnje objekta mjesne zajednice Vreoca i Vrelo Bosne. Izvođač radova je firma „Unigradnja“ d.o.o Sarajevo. Općina Ilidža finansira ovaj projekat u iznosu 186.684,28 KM. Rok završetka radova je mart 2016. godine. Objekat će imati prizemlje i sprat, a tu će se nalaziti i prostorije kancelarija, sale i ostali propratni sadržaji za takvu namjenu. Nadzor nad izvođenjem građenja radova vrši firma „Positive partners“. Na području MZ Vreoca živi 832 stanovnika, a 591 u MZ Vrelo Bosne.

Završeni radovi regulacije vodotoka Tilave i Zujevine

Na području općine Ilidža okončani su radovi regulacija vodotoka Tilave i Zujevine. Peta faza regulacije korita vodotoka Zujevine na lokalitetu Blažuj je završena. Posao je Općina Ilidža povjerila firmi „Mevludin commerc „d.o.o Ilidža, a za te svrhe iz budžeta je izdvojeno 300.001,44 KM. Uradio se obostrani betonski zid visine tri metra i dužine 140 metara.

U MZ Butmir završeni su radovi regulacije korita Tilave. Izvođač radova je firma MGBH d.o.o, a vrijednost 75.800 KM. Radila se regulacija širine šest, a dužine 60 metara. Finansijer je Općina Ilidža.



Počela izgradnja fekalnog kolektora

U naselju Vlako na lijevoj strani rijeke Zujevine počeli su radovi na izgradnji fekalnog kolektora od Rakovice do Mostarskog raskršća koji će se priključiti na glavni kolektor iz pravca Hadžića. Ukupna dužina kolektora je 4848 metara, a trasa je odabrana tako da racionalno omogući priključenje ostalih kolektora kao i pokrivenost kompletnog područja naselja Rakovica i Gladno polje kanalizacionom mrežom. Vrijednost radova je 210.000 KM, a investitori su Općina Ilidža i Kanton Sarajevo. Rok za završetak radova je 90 dana, a izvođač je HP INVESTING doo Mostar.





Mašina za pakovanje dodijeljena Edisu Sadoviću

U okviru projekta „Socio-ekonomsko osnaživanje žrtava od mina i njihovih porodica“, 25. juna 2015. godine Edisu Sadoviću uručena je mašina za pakovanje i vaganje sitno-zrnastih i zrnastih proizvoda od 50 do 1000 grama. Projekat Evropske unije zajednički realizu-

Paketi za postače

Povodom mjeseca Ramazana Udruženje boraca „Prva samostalna brigada Stup“ Ilidža obezbjedila je 50 paketa sa hranom za postače pripadnike brigade i članove njihovih porodica sa područja mjesnih zajednica Stup II, Stup, Stupsko brdo i Otes. Paketi su vrijednosti oko 50 KM, a donirala ih je katarska humanitarna organizacija. Podjela je obavljena 29. juna 2015. godine ispred prostorija mjesne zajednice Stup II. Ovo je druga podjela za Ramazan stanovnicima ovih područja.



Ramazanski paketi za socijalno ugrožene

Povodom mjeseca Ramazana „Braća Mujić“ d.o.o. obezbijedili su 10 paketa sa osnovnim prehrambenim artiklima za socijalno ugrožene porodice sa područja općine Ilidža. Odabir porodica i distribuciju paketa na adresu obavila je Služba za rad, socijalna pitanja, zdravstvo, izbjeglice i raseljena lica Općine Ilidža.



ju ABS-Njemačka humanitarna organizacija i Općina Ilidža koje su još prošle godine potpisale sporazum o saradnji na projektu. „Sa ovom mašinom ublažit ću i donekle riješit egzistencijalne probleme za mene i moju porodicu i da ne zavisim od drugih i da se osjećam društveno korisnim. Koristim ovu priliku da se zahvalim Općini i ABS-u“, kazao je Edis Sadović. Na području općine Ilidža registrovane su 84 žrtve od mina koje se kontinuirano suočavaju sa problemom zapošljavanja, a ovo je jedan od načina za njihovo rješavanje. Do sada je realizovano 14 isporuka za korisnike projekta, a uskoro se očekuje isporuka za preostalih sedam korisnika. Ukupna vrijednost projekta je 94.000 KM, a prosječna cijena poslovnog granta po korisniku je 6.200 KM. Općina Ilidža je učestvovala u sufinansiranju projekta u vrijednosti od 15.000 KM.

Humanitarke u akciji

Udruženje „Zlatna ruka“ Ilidža organizovalo je još jednu u nizu humanitarnu akciju. Vrijedne aktivistice ovog udruženja ovaj put obišle su raseljena lica i izbjeglice na području općine Goražde. Tom prilikom uručili su pakete sa hranom i higijenskim artiklima, odjeću i obuću za 25 najugroženijih porodica sa ovog područja. Osim toga organizovale su iftar za djecu sa posebnim potrebama općina Ilidža i Novi Grad, a podijelile su i bajramske pakete za djecu bez roditelja.





Uređeno dvorište u Drugoj osnovnoj školi

Društveno koristan rad je neodvojiv dio poslovanja. Tako je i firma L'Oréal, provodeći kampanju „Dan građana“ kojom žele istaći značaj volontiranja i solidarnosti među ljudima, posvetila uređenju dvorišta u Drugoj osnovnoj školi.

U sklopu ovog projekta zelena površina iza škole je obogaćena trim stazom za djecu, klackalicama i klupama za odmaranje. Sadržaj će se moći koristiti za nastavne i van nastavne aktivnosti.

Osnovci Druge osnovne škole kao i menadžment i osoblje zahvalni su ovoj kompaniji na uloženom trudu i donaciji, čime su im stvoreni uslovi za kvalitetno i zabavno provođenje vremena u krugu škole.



Podijeljeni paketi za održavanje higijene školama

Općina Ilidža finansirala je nabavku sredstava za održavanje higijene u javnim osnovnim i srednjim školama i vrtiću na području općine Ilidža. Tim povodom, pomoćnik načelnika za obrazovanje, kulturu, sport i informisanje Denis Muhović u Trećoj osnovnoj školi uručio je pakete sa higijenskim sredstvima ovoj školi.

„Općina Ilidža i ove godine, kao i prethodnih, pomogla je u nabavci higijenskih sredstava i nastaviti će da pomaže škole i ubuduće, jer želimo našoj djeci obezbijediti adekvatne uslove za odvijanje nastavnog procesa“ kazao je Muhović.

Općina Ilidža je za ove namjene izdvojila 9.100 KM.



Bazar za razmjenu-prodaju korištenih udžbenika

Ministarstvo za obrazovanje, nauku i mlade Kantona Sarajevo pokrenulo je inicijativu za organizovanje bazara na kojima će učenici razmjenjivati, prodavati korištene udžbenike iz predhodne školske godine i kupovati udžbenike za narednu školsku godinu. Sve općine sa područja Kantona Sarajevo podržale su ovu korisnu akciju. Na području općine Ilidža bazar je održan 27, 28, i 29. avgusta 2015. godine u JU Prva osnovna škola.





Igrama bez granica obilježen Međunarodni dan mladih

Vijeće mladih Općine Ilidža je 12. augusta 2015. godine u saradnji sa Crvenim križem Općine Ilidža obilježilo Međunarodni dan mladih kroz organizovanje takmičenja u Igrama bez granica. Pravo učesća su imali svi mladi od 14 do 35 godina, a takmičilo se u šest sportskih disciplina sedam ekipa koje su imale po pet članova. Bile su to zabavne igre vuče konopca, trčanje u vrećama, brzo jedenje kolača, trčanje sa jajetom u kašici, pomjeri balon i Izvadi jabuku iz vode.

Najuspješnije ekipe su po završetku čekali prigodni pokloni i pehari, ali i za ostale ekipe utješne nagrade.

Obilježavanju Dana mladih se pridružio i pomoćnik načelnika Denis Muhović, koji je istakao zadovoljstvo odzivom i interesovanjem mladih koji promovišu aktivizam mladih, te pohvalio napore i akcije mladih kojim doprinose pozitivnim promjenama, šireg društva.

Antički dani Ilidže 2015

Arheološko udruženje „Panteon“ realizovalo je na Ilidži 21. i 22. augusta projekat „Antički dani Ilidže“. Projekat je podržala Općina Ilidža. Festival se implementira na otvorenom prostoru u neposrednoj blizini parka Ilidža, tačnije kod antičkih iskopina na Ilidži.

„Cilj projekta je prikazivanje života u antičkom dobu na Ilidži onakav kakav je zaista izgledao i kako su ljudi živjeli u tom periodu. Taj cilj ćemo ostvariti kroz dvodnevni festival rimske nošnje, hrane i na kraju povorkom koja će se kretati kroz Ilidžu. Kuhanjem rimske hrane, besplatnom degustacijom iste za sve prolaznike i posjetitelje festivala, šivenjem i izradom rimske odjeće, igrom i plesom omogućit ćemo vrlo interesantne, zabavne, te kroz predavanja i edukativne dane za sve stanovnike Ilidže kao i za one koji budu dolazili iz drugih mjesta. Hvala Općini Ilidža koja je podržala ovaj projekt“ kazala nam je Sabina Vejzagić, predsjednica Udruženja „Panteon“.

„Općina Ilidža je podržala ovaj projekt i nadamo se da je zanimljiv za naše Ilidžance i da ćemo i ubuduće imati slične projekte koji će prikazivati život iz drugih histori-

Peti međunarodni festival folklor

Peti međunarodni festival folkora održavao se 07. 08. i 09. augusta 2015. godine. Prvi dan festivala domaćini KUD „Ekrem Mujkić“ ugostili su učesnike, a navečer održali otvorenje Festivala i organizovali malu zakusku, dok je 08. augusta. 2015. godine održan cjelovečernji koncert na platou ispred Osme osnovne škole „Amer Čenanović“ u Butmiru, na kojem je učestvovalo sedam folklornih grupa. Drugi cjelovečernji koncert se održavao 09. augusta 2015. godine na Ljetnoj pozornici na Ilidži.



jskih perioda „ rekao je načelnik Općine Ilidža prof. dr. Senaid Memić.

Arheološko udruženje „Panteon“ je nevladina i neprofitna organizacija koja je osnovana krajem 2014. godine od strane desetak mladih studenata arheologije, historije i historije umjetnosti.





Okrugli sto Vijeća mladih „Gojaznost/pretilost“

Vijeće mladih Ilidža je 22. jula 2015. godine u Maloj aleji 40 održalo okrugli sto o temi „Gojaznost/pretilost.“

Gojaznost je hronična bolest, koja se ispoljava prekomjernim nakupljanjem masti u organizmu i povećanjem tjelesne težine. Gojaznost je u stalnom porastu pa se svrstava među vodeće bolesti. Međutim, kako je rečeno na okruglom stolu, postoje načini i borba sa ovom bolešću koji mogu biti veoma uspješni. Svoje iskustvo podijelila je Samira Poričanin-Petrešin, novinarka koja se već neko vrijeme uspješno bori sa ovom bolešću, o svojim svakodnevnim uspjesima piše na svom blogu koji prati preko 10.000 čitalaca, (Prekardašijan) istakavši, da ne treba nikad posustajati i odlučno je jačanje volje za savladavanje.

Prof. dr. Amina Ibrahimović-Mahmutović, jedna od predavača je objasnila sa aspekta medicine i nauke probleme koje donosi ova savremena bolest. Anesa Hadžić, studentica druge godine Fakulteta sporta i tjelesnog odgoja u Sarajevu, uspješna odbojkašica i kondiciona trenerica reprezentacije prve pomoći, smatra da vježbama se može uspješno boriti, načinom ishrane, zdravim navikama, te kasnije i nesto intenzivnije vježbanje mora dati prve rezultate borbe sa ovom bolešću.

Dan prije održavanja okruglog stola, šest volontera Vijeća mladih Ilidža je podijelilo nekoliko kilograma jabuka građanima sa područja općine Ilidža sa simboličnom porukom “Zdravlje je uvijek broj 1!” Projekat je finansijski podržala Općina Ilidža.

Sajam pčelarstva

Udruženje pčelara „Behar“ Ilidža organizovalo je Sajam pčelarstva na Ilidži koji je održan od 17. do 21. avgusta 2015. godine u ulici Rustempašina u centru Ilidže. Na sajmu je učestvovalo 10 pčelara članova udruženja koji su izložili pčelinje proizvode i opremu za pčelarstvo. Posjetioci su mogli kupiti livadski, bagremov i šumski med.

„Zadovoljni smo posjetom i prodajom naših proizvoda“, kazao je jedan od izlagača Hamid Čajić.



Ambulantama porodične medicine dodijeljeni poslovni prostori bez naknade

Općina Ilidža je JU Dom zdravlja Kantona Sarajevo, Organizacionoj jedinici Dom zdravlja Ilidža dodijelila poslovne prostorije u vlasništvu Općine za potrebe ambulanti porodične medicine u šest mjesnih zajednica. Prostorije su dodijeljene na period od pet godina bez naknade a nalaze se u mjesnim zajednicama Sokolović-Kolonija, Stup II, Hrasnica, Rakovica, Otes i Osjek koje su ambulante porodične medicine koristile i u proteklih pet godina bez naknade.



Podizanje ekološke svijesti građana

Aktivisti Ekološkog udruženja Aleja-Ilidža, 22. avgusta.2015. godine realizovali su projekat pod sloganom “Sve na svoje mjesto”. Naime, aktivisti su građanima Ilidže podijelili brošure koje sadrže podatke o periodu razgradnje, pravilnog odlaganja otpada i tekst edukativnog sadržaja. Na ovaj način aktivisti ovog udruženja žele da svijest građana o važnosti zaštite okoliša podignu na veći nivo i tako daju svoj doprinos zaštiti i očuvanju prirodnog bogatstva koje posjeduje općina Ilidža. Projekat je finansijski podržala Općina Ilidža.



Sinanović osvoje zlatnu medalju

Član Kick boxing akademije Ilidža Edin Sinanović osvojio je zlatnu medalju na Balkanskom prvenstvu, održanom u Nišu. Sinanović je u finalu u kategoriji do 60 kg savladao reprezentativca Srbije Aleksandra Đorđevića. Velike zasluge za ovaj uspjeh pripadaju njegovom treneru Nerminu Bašoviću svjetskom prvaku iz Francuske 2003. godine.

„Nisam iznenađen ovim uspjehom, jer je Edin odlično trenirao i spremno je dočekao borbe u Nišu. On je jedan od naših najboljih boraca i vjerujem da će u 2015. imati još uspjeha“, kazao je Bašović.

Sinanović je u ovoj godini osvojio zlatnu medalju na Evropskom kupu u Karlovcu, zlatnu medalju na Međunarodnom turniru Ilidža open i izabran je za najboljeg juniora na Prvenstvu BiH.

Prijem za predstavnike ŽRK "Ilidža" i MRK "Igman"

Načelnik Općine Ilidža prof. dr. Senaid Memić upriličio je prijem 12. augusta u prostorijama Općine za sportske ekipe koje su ostvarile značajne rezultate u 2015. godini, Ženski rukometni klub "Ilidža" za osvojeno drugo mjesto u premijer ligi BiH za rukometašice te plasman u Evropski kup i Muški rukometni klub "Igman" za plasman u premijer ligu. Načelnik Memić je uputio čestitke povodom ostvarenih uspjeha te kazao kako svi sportisti na ovaj način u najboljem svjetlu promovišu općinu Ilidža te na taj način pokazuju da ova općina ima svijetlu budućnost sa ovakvom omladinom. Tom prilikom uručio je predsjednicima klubova novčane nagrade.



Četvrti moto maraton Srebrenica 2015

Moto klubovi „Suburb's Riders“ Ilidža i „Blue Knights Chapter“ iz Bihaća organizovali su Četvrti internacionalni moto maraton Srebrenica 2015. pod nazivom „Da se ne zaboravi i ne ponovi“ posvećen godišnjici srebreničke tragedije. Učešće je uzelo preko 300 motorista iz Bosne i Hercegovine, Hrvatske, Slovenije, Austrije, Švicarske, Njemačke i Italije koji su se 10. jula 2015. godine okupili na parking u ispred Energoinvesta na Ilidži, gdje je obavljeno akreditiranje učesnika, podjela majica i lunch paketa, nakon čega su u pratnji policije krenuli na defile kroz grad gdje su se zaustavili i položili cvijeće na spomen obilježje Djeca Sarajeva, zatim su krenuli prema Memorijalnom centru Potočari. I ove, kao i predhodne godine Općina Ilidža finansijski je podržala ovu humanu manifestaciju. Učesnike Moto maratona ispratio je načelnik Općine Ilidža prof. dr. Senaid Memić i zaželio im sretan put za Srebrenicu.

„Napredak-Willa“ prvoligaš

Umeću kvalifikacija za ulazak u prvu ligu Bosne i Hercegovine, Bočarski klub „Napredak-Wila“ pobijedio je BK Čaplina i prvi put u u svojoj desetogodišnjoj istoriji postao prvoligaš. Uspjeh seniora motivisao je i omladinu koji su na državnom prvenstvu za pojedince od 18 i 23 godine u Posušju osvojili 10 medalja, i to Nihad Milić, Kenan Bašić i Nedim Milić.

Odlični rezultati seniora i omladinaca BK „Napredak-Willa“ su potvrda da se skromnim sredstvima, ali i sa dobrom organizacijom kluba i zajedništvom mogu ostvariti vrhunski rezultati. Čestitamo!

„Znam da su sredstva koja vam je dala općina po 2.000 KM nedovoljna za vaše aktivnosti, ali ona su samo dokaz da mi cijenimo vaše rezultate i da vas želimo nagraditi. Imate našu podršku, na nas možete računati, znamo da sredstva koja smo dali nisu realna za vaše potrebe, ali toliko imamo mogućnosti. Nastavite postizati rezultate, moja vrata su uvijek za vas otvorena,“ rekao je načelnik Općine Ilidža prof. dr. Senaid Memić.



Ambasadori bosanske kulture

Na festivalu folkloru u Alžiru koji je održan u gradu Sidi bel Abbesu učestvovali su i članovi KUD Ilidža na kojem su pored domaćina nastupili i predstavnici iz 15 zemalja svijeta sa gotovo svih kontinenata. Među učesnicima iz Indonezije, SAD-a, Rusije, Libana, Indije, Grčke, Kine, Bugarske, Srbije, Obale slonovače, Burkine Faso i Palestine posebne simpatije dobili su naši predstavnici koji su bili najmlađi folklorni ansambl na festivalu.

„Naš ansambl je privlačio ogromnu pažnju i bio je interes svih vrsta medija. Svi su nas željeli čuti i vidjeti i saznati nešto više o historiji naše zemlje, kulturi, tradiciji i običajima, a pokazali smo se i kao najbolji ambasadori naše zemlje. Ovom prilikom željela bih da se zahvalim načelniku prof. dr. Senaidu Memiću, pomoćniku načelnika za obrazovanje, kulturu, sport i informisanje Denisu Muhoviću i gospodinu Aliji Budnji koji su pomogli u realizaciji ovog našeg gostovanja u Alžiru“, kazala je Jasmina Feriz predsjednica društva.